

摘藻堂四庫全書薈要

集部

欽定四庫全書薈要卷二萬五百四十一

集部

明詩綜卷六十八

翰林院檢討朱彝尊編

宋登春 三首

登春字應元新河人有鵝池生集

靜志居詩話王喬之玉棺桓司馬之石椁可以
謚曰至愚然而楊王孫之僇葬劉伯倫之荷插
便埋亦矯枉之過也鵝池生語邢子愿云君視
宋登春豈杉柏四周中人行將浮錢塘脫履江
干乘潮解去既而果躍入江魚腹之葬果勝於
一棺之土乎君子譏其誕矣生詩平淡寡深思

不失為賈浪仙

李才江一流

薊門

桑柘兵殘後人家夕照中天秋沙鴈沒月冷戍樓空選
將燕山北擒生遼海東城南餘戰地燐火夜深紅

九月三日方別駕攜酒殽見過因懷徐荊州

客淚秋能下人情老自知塞寒鴻鴈早江暖菊花遲對
酒憐吳語聞歌憶楚辭明年誰更健重把紫萸枝

秋日野望

聽鳥中林性看雲故國心地界湘漢闊天遠洞庭深老
馬空知道窮猿豈擇林十年書劍客寂寞到如今

陳 昂 三首

昂字雲仲莆田人有白雲先生集

詩話山人以倭亂率妻子奔豫章織草屨易粟
不給則賣卜已而入楚蜀轉客金陵間賣文為
活既窮以死其自序略云昂於詩尤嗜五言第
家貧無書誦王右丞作即師右丞誦杜工部作
即師工部可謂多
師以為師者也

宿江邊閣

暝色江邊閣行吟易斷魂風前兩岸葉月下一聲猿夜
哭誰家婦寒號何處邨洞庭春水動雇艇去荆門

閩南登樓

切莫登樓望令人更慘淒戰場多鬼哭息壤聚烏啼黃
霧埋城郭寒風死鼓輦深樓巢燕子來往亦銜泥

移居巴陵

此即巴丘戍相傳魯肅城古今餘往事兵火剩殘生楚
水為漁便湘山結室平地靈如獲託亦足寄遐情

馮

遷

七首

遷字子喬上海人有長鉞齋

潘子仁云子喬采掇菁英鋪張

平實吾見其進未見其止也

朱邦憲云子

喬緣情定體因體鑄辭雄麗雅澹之言皆備

詩話子喬詩出辭似淺而鍊格頗道洵之法之沙礫自去

與俞仲蔚

仲蔚青雲姿偃蹇山澤間遺棄當世事賦詩獨精專大雅既寂寞下接蘇李肩晨昏弄筆札几席生雲烟流傳翰墨林字字堪磨鐫相過遇佳夕春風盍和顏燃燈設

清醴微奧相與宣高懷曠千載鬱鬱忘冥筌所嗟歲云暮何以奉周旋

病卧十日城中米價騰踊感而賦此

兒童負裏朝出市日暮歸來哭不止斗米新騰價百錢
布匹雖行賤如水盡言久旱江水枯賈舶商船難到此
城南早稻秀不實城北晚禾乾又死悲哉野老啼無聲
十日病卧茅屋裏

送唐世其北上

君去青山外予吟綠水邊忘機鷗性狎快意馬蹄穿魏
闕通霄漢吳臺思管絃遙知聽雨夜定憶小樓眠

潘伯明邀飲朝天宮

邀我来仙界林深引玉笙坐來黃鶴舞醉倚白雲生江
作千年塹山圍六代城興亡易悲感何地訪初成

荆溪夜泊

細雨延春酌寒雲濕暮鐘客舟依樹小野火隔溪重風
水期無定登臨興轉濃明朝買雙屐共爾躡羣峰

復餞顧內翰於南浦因經曹公戰壘

映竹船牕水氣涼渚風微泛白蘋香今朝相送即相別
明日故人非故鄉蔓草女牆橫斷靄荻花軍壘護斜陽
銀河舊與滄波接一望靈源萬里長

葉之芳

五首

之芳字茂長無錫人有雪樵集

寒食金陵病中作

東風吹短褐寒食傍天涯客舍孤城雨鄉心二月花遠

山青極浦芳草綠平沙不盡王孫淚年年感物華

靈江舟中

赤城東去水滌洄無數寒花夾岸開越國青山臨海盡
靈江秋雨挂帆來舟中客淚隨楓落天外鄉心逐鴈哀
如此蕭條須盡醉已知淪落不言才

送韓漢章自楚還蜀

河梁日暮罷離尊送爾西遊入故園湘渚月明春飲馬
巴江花落夜聞猿青山易墮天涯淚芳草空消客路魂

何事不歸嘗寄食道傍誰解惜王孫

題江邊柳

揚子津邊柳秋風葉乍凋生當離別後不得長長條

入新安

可怪新安水舟從石上行千尋猶見底不數越江清

柳應芳三首

應芳字陳父海門人有柳陳父集

姚園客云柳陳父詩如田

舍翁暴作封君舉止生澀

詩話陳父僑居金陵之杏花邨每出行吟俛首
沉思觸人肩面不自覺語所知曰作一詩必離
魂數番乃得稱意昔人所云撫斷數莖髭用破
一生心不過是矣其詩頗選高格第去七子仍
遠未

送周京兆建言再謫代州判官

向託湘流弔屈原十年岐路不堪論
到來京兆纔三宿謫去承明只一言
馬邑秋高邊月近鴈門春盡塞花繁
再投萬死風霜地猶感全生聖主恩

初聞倭警言有感

東倭海外播風煙回首扶桑氛祲連
白羽插書傳幕府黃金刻印拜樓船
朝廷欲問來王日父老曾經入寇年
辛苦折衝胡少保永陵一詔至今憐

春閨

黃鶯不隻啼紫燕還雙栖栖在妾梁上啼向妾牕西

安紹芳

七首

紹芳字茂卿無錫人國子監生有西林集

葉茂長云

茂卿學瞻才高生不得志有浮雲當世之志厭
栖鄉曲慷慨遠遊興至為詩調高辭秀迴拔時

流 俞義長云茂卿詩不追逐
時好 搦管抽思一以清婉為尚

山中夜坐

夜氣何蕭森空山思寥廓不知風露寒
彌覺衣裳薄美人渺難期對酒不成酌
白日虛牖生微聞桂花落

旅泊

秋盡仍為客江寒獨繫舟微霜下木葉
遠火露蘋洲無那風前鴈偏生枕上愁
孤帆明更發何處復淹留

送曾中丞入蜀

玉節遙看萬里行
鳴笳吹角動西京
天邊劒閣雲連棧
樹裏巴江錦作城
檄到百蠻新喻蜀
圖開八陣舊藏兵
褰帷父老煩相問
辭賦何人似長卿

花津

水上春霞明
花開幾千樹
不是避秦人
人疑避秦處

一葦渡

夕陽下前溪
西風吹野渡
不見折葦人
獨立滄江暮

春盡日寄華公衡

惆悵春風暮懷人興轉孤夕陽空極目芳草隔南湖

柳枝詞

赤欄橋畔柳絲長帶雨和烟總斷腸肯向西風恨搖落
願留春色待蕭郎

聞龍三首

龍字隱鱗鄞縣人處士有行藥吟幽貞廬詩集

屠田叔云隱鱗詩如溪上人家曲几疎窓長與
水雲弄色王右仲云隱鱗詩清和穩暢卓然

成家

詩話隱鱗為冢宰莊簡公孫以孝友德行聞於鄉里初不以韻語自負然其近體頗閒整特少警拔耳

山居即事

積雨朝來歇諸溪盡急流
隔河看飲犢倚檻有浮鷗
雲冷松根石風微竹外樓
蕭然無一事開徑遲羊求

送趙彥忠游吳興

吳興舊游地遠想尚依依
荻岸青簾舫桑林白版扉
計程千里近屈指一年違
從此斜陽外看山悵獨歸

聞吳少君病而阿霽死悵然懷之

來往家無定饑荒病未蘇路危僮僕盡身老子孫無何
日忘機事全生付酒壚榮期自有樂不用哭窮塗

譚清海一首

清海字永明東莞人有靈洲詩草

詩話處士以布衣思自奮功名永陵時上言十
事不納穆宗即昨復走京師進三大禮疏其畧
曰我太祖高皇帝文德武功前此未有一傳至
建文君紛更法制文皇帝於是訓兵除之即位
之後悉復洪武舊制夫成祖未即位之先建文
君天下者也四年以來其措置雖不足觀然有

欽定四庫全書

明詩歸
卷六十八

一日之君必有一日之政事而使之湮沒不傳
將來者何以徵也且洪武三十一年爾今日三
十五年豈實天之後猶能撫綏四海統理萬幾
此非所以示信也陛下宜勅令史官修其一朝
實錄仍以建文年號復告高廟而追謚之庶幾
文獻足徵可以信今而傳後矣又按正統十四
年額森入寇大同失利太監王振不與大臣謀
議獨挾天子親征命郕王居守師駐土木天子
蒙塵京師大震皇太后召百官入集闕下命郕
王權總萬幾既而復命郕王宜早正位蓋以時
方多事國賴長君故也王涕泣固辭於時文武
羣臣交相勸進然後不得已即皇帝位夫土木
之難非國家大變哉當是時社稷為重君為輕
使非景皇帝預登大寶臣恐天下之事難言矣
況多難之秋篤任于謙選將擇能練兵主戰宗
社不至於南遷伊誰之功歟及英宗皇帝駕還

景皇帝迎拜相持而哭推遜良久授受之意昭如日星一旦不豫英宗復位此天之所順也人之所歸也而賊臣徐有貞輩迺貪天功以為己力首倡奪門動搖國本駕言定策獵取侯封構骨肉無已之禍端損國家萬年之元氣遂使景泰七年君臨天下之號一旦改除于謙社稷之臣竟死刀下每讀國史流涕傷心不能不飲恨也英宗復鑒其誣深懷怨悔未及改遽爾上賓憲宗敦念親親用成先志上尊謚曰恭仁康定景皇帝然而未得稱宗未饗太廟歷朝因循實為缺典夫人臣有功於國者猶得附饗於廟而況正位於九重之上七年之間社稷攸賴德在天地功在祖宗不幸晏駕一二讒賊之臣迺隨而媒孽之遂至不得以列羣宗而安廟祀孔子所謂正名之義安在今陛下即位之始宜明詔中外尊為某宗祔祀太廟以正一代昭穆之倫

以敦萬世宗親之義仍以于謙配饗用報有功
復勅有司震暴有貞之罪削其官爵夷其墳墓
以為將來不忠之戒庶幾祀典可明而典刑可
正矣又按太祖高皇帝首建太廟為同堂異室
之制而奉玄恒裕淳四帝居之成化間九廟已
滿下詔議祧於是以太皇帝為始祖以太祖太
宗為世室於寢殿後建祧廟羣主以次遷入焉
至嘉靖十七年先帝斷自宸衷獨奉高皇帝為
不遷之祖改號太宗為成祖復上獻帝為睿宗
而並附九廟祀焉夫太祖有功於天地創業垂
統為萬世計尊之為始祖禮之正也獻帝篤生
聖子入繼天朝我先帝一念報本之心不能自
已而尊之為帝祀以天子之禮此猶可以義起
者若升祔九廟而與列聖並饗臣不知於義何
取於禮何居天下之分奚辨乎昔武王纘太王
王季文王之緒以有天下是天下者太王王季

文王之天下也故武王得以追王太王王季文
王也猶我太祖之追尊四祖也今先帝所嗣之
緒果繼之獻帝乎抑繼之祖宗列聖乎使繼之
祖宗列聖則先帝之天下祖宗列聖之天下也
先帝不得而私其親也今饗其親於九廟之中
則是先帝之天下既受之祖宗列聖矣而復受
之獻帝謂非有兩統乎此一人之私也非天下
萬世之公也我朝之制子為天子其母稱太后
不稱后不得竝嫡同饗於是有所奉慈之殿所以
明微也陛下謂君臣之分與嫡庶之分奚殊焉
獻帝本安陸之藩王曾北面於武宗者今升祔
九廟而與羣宗竝列則是儼然居武宗之上矣
為天子之母者不可以庶而竝嫡為天子之父
者獨可以臣而尊君哉臣聞獻帝在藩邸時克
遵朝廷制度惟謹天下稱順焉故於其崩也而
武宗謚之曰獻夫生而能恪守藩臣之禮未有

死而肯倒置冠裳者也今儼然居武宗之上臣
恐獻帝在天之靈必以上下之分不可踰也禮
義之防不可越也祖宗相傳之統不可私也將
感然不安於其位矣夫祭者所以安先人之神
也既感然不安於其位則又何愛於附饗何取
於太廟哉陛下下方將東正奉公為天下矜式必
不以私親之故而廢禮其勅禮部會多官集議
再訂廟儀務求典禮之正庶於祖宗祭統不至
生嫌獻帝神靈得以安饗而亦不失先皇尊親
報親之心祀典由是而正禮義由是而安天下
之分由是而辨而萬世人心之公定於此矣以
上三事皆言人之所不敢言且倡議於楊時喬
詹沂劉曰梧歐陽調律諸臣之先而實錄不書
野史失載故節錄之處士善談兵見知於歲少
保歸隱羅浮見日峰
鄉里稱為見日山人

西游別貞復

君望東海歸予從西粵游興言感今昔行路何悠悠
白日往不返頽波逝東流青青澗中蒲泛泛江上鷗
連枝與比翼庶以解我憂

楊承鯤

七首

承鯤字伯翼鄞人太僕卿美益子國子監生有
西清閣詩草

詩話伯翼論文謂先民有作穀率存焉不入穀
率雖工無當也論詩厭薄王李謂暗中摸索知

為今人之詩惟誦之不類今人而不蹈古人之
迹斯善矣譬如學書然方其心慕手追必盡肖
古人及其成也不必盡肖
乃成家可稱知言者也

七哀詩 二首

朝發桑乾河暮宿樓桑邨王氣久消落靈跡祕陳根物
色遞遷化日月屢崩犇奈何此征夫跋涉無朝昏驅車
冒榛荆忍飢過市門餘雪照墟里頽陽藹荒原隴墳鬱
相望賢達無一存顧彼翳桑人太息涕潺湲

客行無昏曉乘月理歸軒仰視明河低畢昴正闌干繁

霜生肌骨齒戰不能言空野無人聲雞犬互悲喧羸馬
為哀鳴僕夫自辛酸行行日已老帝鄉日已窅朔風裂
緇衣客歸苦不早燕雀懷故棲游魚思在藻日月逝不
處誰能長美好眷我平生親言旋永相保

無能

漠漠島烟合紛紛林月生小山全入霧大水半浮城鳴
櫓通晨過疎星永夜明無能逐世好嬾與癖相成

寄題江心寺

勝絕江心寺江空塙影長潮痕剝斷石海氣濕危廊僧
老秋無寐鵬寒翅有霜英雄餘涕泗風雨弔殘陽

小山

還山抱黃犢沙草日蒙蒙竹屋難禁雪松門不掩風香
餘栗葉火寒落桂花叢寥落清江外吾生亦有終

小山歸得長文書及新詩二首兼惠茅栗如數奉
荅

茅栗何年種分匡見小溪色兼霜芋早味與露葵齊斂

袖呼兒子嘗新媿老妻永無懷橘日剩有萬行啼

脩園觀刈稻詠懷

老覺衣裳薄寒催捃拾頻尋常邨徑小來往路人新沼
靜飢魚出林早宿鳥馴雞豚與閭巷不厭野夫貧

諸葛鯨一首

鯨字君騰襄陽人

一云蘭溪人

渝城人日簡字給事

訪舊來何晚輕帆落驛亭江迴劒外白山繞漢中青萬

里逢人日孤城感客星知君懷諫草翹首望明廷

沈懋嘉 一首

懋嘉字會真平湖人懋孝之弟諸生有白巖遺

藁

秋鳥

陳山西麓海東頭細網長竿帶綠韝買得山禽如粉脆
屠墳十里稻花秋

詩話吾鄉屠康僖墓在乍浦陳山山濱海宰木
翁鬱每東風起有鳥海外來集於樹土人張羅

持竿捕之大者曰戴毛鷹亦曰鷁鵠中者曰花
雞小者曰錯籬剖其腹有青椒其骨甚脆號為
秋鳥文學詩
蓋紀其實

裴邦奇一首

邦奇字庸甫聞喜人有巢雲集

望嶽

衡陽秋色翠

一作碧

氤氲南望蒼梧隔楚雲自去重華招

不返月明瑤瑟怨湘君

黃維楫二首

維楫字說仲天台人

送王元甫舍人使襄藩

玉門將醞酒使者捧銅圭
玉節湘雲外星軺漢水西
恩頒丹鳳詔歌唱白銅鞮
山簡流風在能無醉似泥

武林與王符李葉四博士夜酌

烟草碧連天吳山春可憐
客情千里外鄉語一尊前
細雨鳴深夜疎燈照別筵
關河又明發罷酒各淒然

陳有守 二首

有守字達甫休寧人有六水山人詩集

徐子與云山人

詩篇雖不盡離津筏而體裁宛密大雅不羣

詩話山人好游轍跡遍湖海以郡有南浦六州水胥匯於川注海遂自號六水山人一曰天瀛山人又曰斗下老人自比沈麟士王孺仲其詩取材目前不甚鎔鍊所選徽郡詩斤斤繩墨不

失正音

游邵氏園

極目眺遠山振衣出東郭白雲媚幽岡蒼烟澹長薄登皋一舒嘯餘響應林壑空緇城市塵未諧江海諾夙心

恆超曠世故任龍蠖

觀音巖

紺閣披雲竹樹參天花傳說見優曇妙音一去諸天遠
癡絕行人拜石龕

盛時泰二首

時泰字仲交上元人貢生有蒼潤軒集

詩話沈啓南題倪元鎮畫云筆蹤要是存蒼潤
畫法還應入有無盛仲交畫師元鎮文徵仲遂
以蒼潤題西冶城之小軒仲交性愛山水去郭
二十里為攝山山之左有大城山結精舍其中

時跨一青驪欣然獨往嘗為子娶婦其妻戒勿
他往忽隨友人往城南古寺數日乃還妻愠而
詈之乾笑而已張肖甫開御史臺於句容仲交
醉過戟門之鼓肖甫曰安得此狂生必盛仲交
也邀入復飲達旦乃別萬厯初元以陪貢試吳
下肖甫謂曰子過姑蘇宜一謁王元美遂攜所
著兩都賦謁元美於小祇園元美贈之詩曰遂
令陸平原不敢賦三都又三日之內遍和元美
擬古詩七十章元美為之氣奪云

初春送朱比部

幾年官寄白雲司日日行吟湖水湄五馬西川今作守
一尊南郭暫相持天邊雲樹依臺遠雪後春濤出峽遲

自昔蜀中饒勝蹟品題應是待新詩

寄武林朱九疑

湖上輕風拂柳條美人吹笛向平橋
欲知胥浦潮初退正是秦淮雪半消

張正蒙 二首

正蒙字子明江寧人

顧太初云隱君年九十餘猶能日行數十里無倦不

多飲酒而善飯如壯夫詩法中盛唐饒王孟韋柳之趣

商人怨

江上商人歸試問商人事商人不敢言相對但垂淚

過王德載牆東別業

舊是君公隱相期共避喧落花春雨巷垂柳暮烟邨
外青山出尊前白鳥翻澗聲流不竭吾意欲尋源

馮敏効一首

敏効字忠卿平湖人給事汝弼之子有小有亭集

舟行

水遠連天碧秋深共客寒孤舟迷去路頻對夕陽看

程伯陽一首

伯陽字師道歙人

王仲房云師道家貧賣藥自給詩多漫與而沉思者自入

法

過南山懷許宣平

仙人去已久訪古經南山丹竈亦已沒白雲長自閒風
吹桂枝綠雨落桃花斑空傳負薪句沽酒何時還

馮科

科字子盈嘉善人布政使盛世之父有東皋吟
吳江逢越客徐生

賣藥長為客浮萍寄此身因沽吳市酒得值越鄉人白
雨三江暗丹楓十月春追思十載事不覺淚沾巾

孫文簾一首

文簾字伯諧歙人

王仲房云伯諧好神仙山居獨行洞簫在佩不顧俗人訕

笑其詩任性放吟嘯於祖述間有合作便越凡情若行人欲問前朝事翁仲無言對夕陽足稱

佳句

逢鄉人

爾從山中來恰喜江上遇
吾家老梅花開到第幾樹

曹昌先一首

昌先字子念一字以新太倉人

少年行

長安兄弟舊知名半是期門半射聲
醉就名姬壚畔宿
詰朝齊赴受降城

欽叔陽三首

叔陽字遇公吳縣學生入國子監有集

詩話太監孫隆以督織造駐蘇州朝廷方起稅
額惡少年行賄充委官乘輿與張蓋勒索商稅民
不堪命崑山人葛成率衆二千人分作六隊一
人搖蕉扇前行後執挺隨之知長洲縣事鄧雲
霄見民情洶湧擒委官頭目械於玄妙觀衆立
毆死裂其尸知府朱燮元勸諭始得解散此萬
厯二十九年事也時葛成慷慨就獄後得宥罪
又二十餘年而有顏佩韋等實先啓其兆云遇
公謠凡一十三首茲
錄其音節近古者

稅官謠 三首

四月水殺麥五月水殺禾茫茫阡陌殫為河殺禾殺麥

猶自可更有稅官來殺我

千人奮挺出萬人夾道看斬爾木揭爾竿隨我來殺稅
官

稅官來百姓哭虎負嵎獠升木壯士來中貴走十二人
三授首歡樂崇朝不及夕倏忽頭顱已狼籍投畀烏鳶
烏不食

張名由 二首

名由初名凡字公路蘇州嘉定人有張公路詩

集

詩話公路居平世而好言兵棄家產僮僕以避徭役可稱知幾之士蓋先唐婁程李四子稱詩而學文於震川者

吉貝辭

禹貢故江道今已失其真西亂北入婁浦東接春申中
淤百餘里高飛起黃塵三年棄不治地頗生理殷九夏
耰鉏出三時雨露新吉貝萬餘頃其葉何蓁蓁秔稻產
三吳初不係海濱陵谷日變遷造物亦至仁嗟嗟肉食

謀此理難具陳

空堂

秋蟲響空堂
纖月下幽渚
鳥驚風外林
花落庭中樹
羈棲興遠懷
城河隔新雨
耿耿良不寐
脈脈以無語

俞安期

十三首

安期初名策字公臨既更今名改字羨長吳江

人有琴琴集

朱雲子云羨長語多雄壯如望海
云星臨東極無分野山入南荒有

沃焦廬山絕頂云爭趨大海千江定纔入中峰
兩郡分寄臨洮監司云桃花東道來天馬木葉

西山見玉狼寄建昌兵備云竿馬全教
歸漢北竹王那許擅南中皆名貴可傳

詩話羨長之名由元美明卿伯玉而成詩亦兼
綜三家原本李獻吉長於獺祭賦景有餘言情
不足如入隋苑觀翦綠花青紅碧綠非不
爛然奪目即而視之與根株總不相附

烏沙阻風

獵獵闔闔風吹彼江漢流崩流一何急阻我西行舟擔
篙引百丈人力非不周但如宋都鷁退行良非謀旅情
既昏亂朱炎苦相讎畢竟泊楓林繁陰結綢繆憶從辭
妻孥再見蓂葉抽前期猶漫漫返顧多沉憂沉憂不能

揮奮思弋青丘

武夷 二首

晨興命篙師溯流泛清汜鷁首轉石湍九曲茲其始峰
巒縱異姿崖壁夾重詭參錯駭愕形萬狀不相似林林
從孤舟紛紛列兩涘回眺天柱石端立若冠峙其上亦
宏奧云有天池水易代投玉簡遣使歷千禩子騫謫居
時仙客咸來止晉代八真人異姓四女子謫籍周有期
上昇具由此控鶴彼何人曾否來主禮

繫纜仙船巖三曲漸已及云何二仙艇中壁懸石隙歲
月固不知神化亦奚測更無堯年潦安得逮茲息豈墜
絳渚間天路將安適或由巨靈掌攜之化人國莫謂藏
壑牢夜半負有力願借拯迷津衆人免沉溺

神鴉行

甘將軍廟富池口廟前羣鴉何太馴商舩經過浪索食
撲刺雙翅飛近人上投餅餌或片嚙高挈低攫疾若神
競言此鴉莫彈射將軍精靈所變化中之不斃亦不傷

風波恐使神明咤吁嗟乎將軍氣槩籠古今強吳捍魏
人所欽精靈縱化亦貔虎安得瑣瑣為微禽神鴉神鴉
汝曹憑藉將軍力不加彈射還投食何殊僕隸在權門
安然請索無不得

卜居陽羨

雞犬成墟落蕭蕭半畝宮湖山元作長田舍復稱翁五
口中人產千家太古風無由知帝力耕鑿自為功

憶家

故國千山外經秋遠別離浮生能幾日為客此多時衰
眼高堂淚寒砧少婦悲天涯念游子風雨共淒其

青草湖

秋霜枯洞庭秋草入湖青漁屋遷卑壤風帆就遠汀鴈
鳬沙不整魚鼈塹多腥回想波濤日陰沉託水靈

過洞庭湖

南北占星日相隨任遠飄輿圖輸浩蕩舟楫變昏朝鴈
力翻風盡蛟宮隱浪遙最憐無定處雷雨失青霄

望海

積氣茫茫九水都望來空闊盡東隅
雲霞午夜浮光動
雷雨中流片影孤
日有靈烏棲析木
時無游馬繫秦蒲
島夷向識滄波道
烽燧防春亦遠圖

送顧道行副憲之山東

鬪雞走馬俗稱雄
絕島窮邊路亦通
卉服仍教歸禹貢
短衣須遣變齊風
嶽雲今古懸封上
海日尋常起夜中
我有所思愁遠道
自今長望泰山東

登祝融峰

中天積氣入清涼
雲霧翻看地混茫
雨挾蒼龍奔下嶺
星懸朱鳥定南方
何年石簣藏金簡
自古山祇禮赤璋
壇上長流青玉乳
神池高捧帝臺漿

謁禹陵

水土開荒服憂勤
任聖躬八年忘內顧
四載畢前功歷數
虞咨及巡游夏諺
同會稽臨絕徼
道里記方中玉帛
諸侯集梯航萬國
通重輝扶舜日後
至戮防風論德人

無間傳家祚莫終寢園非遠隧祠廟異卑宮祭本天酉
孝民猶俗尚忠穴深藏詭物石立寔神工祕守玄扃使
奇探太史公為魚心感歎酌水意尊崇草莽成臣禮精
靈鑒鄙衷願為松柏樹朝暮護青蔥

東濠雜興

青谿東九西九白鳥朝雙暮雙結屋何殊柳浪投竿別
是桐江

何白四首

白字无咎永嘉布衣有汲古堂集

詩話无咎起於側微事容有之第考萬厯庚辰履歷龍君御初授徽州府推官鐫級改温州府學教授入為國子博士未嘗任温州司李也錢氏遵王殆亦道聽之說汲古堂集原亦出於七子頗與俞羨長相近

長干客舍同周叔宗夜坐分生字

莊塗輾塵軌末路多所嬰况復歲道盡懷歸軫予情之
子秉高韻神恬物自輕處順鮮有觸居喧若無營偃仰
寄一室展玩忘寢興高梧散縹帙風琴落虛聲櫺卑景

先夕墉高曦易傾幽光代明燭寒月暖前楹焚枯命芳
醕歡燕惟平生情披語已洽壘虛時載盈寸慙得所遣
冀此數來并

村翁行

老翁耕種居西邨白頭不到城東門翁言淳朴日非昔
我覺勝兒兒勝孫大孫自託能當戶負租往往凌田主
日斜歸自縣門來桑下乘涼說官府

淮陽歸興

淮泗秋風動地來，月明如水鴈聲哀。
南經伍員吹篳篥，北眺曹公較弩臺。
歸路漸香菰米飯，佳期已負菊花杯。
愁聞烽火連東北，極目浮雲黯未開。

莫愁湖逢程德懋

莫愁湖邊驚暮春，暖風霽日搖青蘋。
柳條繫馬不辭醉，飛絮滿天逢故人。

陸

弼 六首

弼亦名君弼，字無從，江都人。歲貢生，有正始堂。

集

李本寧云無從詩有六朝之靡曼精工有唐宋之舒緩流暢各臻其勝

有鳥

有鳥東南來為巢良已
劬彼鳩胡弗仁一朝奪而居我
躬不遑恤安所念拮据
逝將訴上帝九閻莫可呼
鳳皇三歎息謂鳥亦何愚
不聞晉與魯封土百里餘
三桓逐其君六卿析其都
遂使帶礪邦忽焉為丘墟
自古皆有然勿謂天道迂
天定能勝人茲理若轉樞

韓侯祠

秋風開古廟聞此祀王孫漫說封侯相徒傷過客魂楚
歌空激烈淮水易黃昏我亦懷知己漂零未報恩

哭亡弟惟良

早罷諸生籍貧無季子田暮齡看汝健朝露竟余先無
復誇聯玉徒令歎逝川山齋姜被在攬處一潸然

哭梅季豹

失意長為客招魂忍向君生難逢醒日死孰問遺文末
路淹蓬累他山隔鴈羣蕭蕭桃葉渡團扇掩秋雲

謁于肅愍公墓

荒墳鄰近鄂王宮，異代孤臣伏臘同。
北狩忽聞哀痛詔，中興多仗保釐功。
百年社稷回元氣，五夜松杉起疾風。
聖主祇今恢廟略，玉門聞已罷和戎。

晚泊毘陵諸君攜酒過集舟中

孤城春水浸桃花，白髮逢君酒重賒。
一曲清歌滿船月，不知今夜是天涯。

黃克晦八首

克晦字孔昭惠安人有黃孔昭詩選

沈嘉則云孔昭多深

沉之思本之雄渾發以春容情以景生語必自鑄字不虛設氣完神定大雅之材朱秉器云

孔昭詩意常獨造雖以古人為宗而不蹈襲片語何思默云孔昭詩如入幽林長薄其樹木

皆世所有而鬱然翳翳祇覺老蒼歷下瑯琊但稱盧謝未能或先也

詩話孔昭少為畫工壯歲以詩名其金陵游橐則張仲立刊之西山唱和編則李于美定之金

臺詩則林登卿鐫之登卿稱其古風天籟自鳴近體森然紀律青溪社集諸公允當推為祭酒

感時

繁霜凋草木谿谷正悽惻玄冥慘不舒改歲固云逼萬

物各有因盛衰迭今昔寧見武安門猶納魏其客

江行

江風來自北弭櫂江水南白浪聒不息游氣昏空潭曠
野何蒼蒼引步隨幽探鹿鳴求其牡豐草非所甘江燕
啄不食念雛聲誦誦物性固如此游子何以堪慨彼江
中水衝波無定端古人忍飢渴旨矣非空談

夢游武當山懷鄖陽江使君

祝融奠朱方五嶽有定目胡不以參山竝列而為六夜

夢登其巔游氣承我足千峰歷嶮巖如車走平陸上為
帝者居星辰纏其麓崢嶸羽人宮參差徧巖谷中有不
死人終歲茹草木授我鳥迹書奇文不可讀雞鳴忽焉
寤惋歎淚相續

聽話西苑

雷殿清虛太液秋至尊多在望仙樓樹深宮闕東西合
月出東西下上流麟圃紫芝春曄曄兔園白鹿曉呦呦
軒皇鼎在龍髯斷露箔風簾不上鈎

送何仁仲鴻臚

乍列鵷班黼座前，懷山歸櫂忽悠然。
薜蘿曉過湘妃廟，葭菼春迷宋玉田。
白雪新聲供奉曲，悲風古調別離篇。
重來何處偏相憶，問我朱陵訪道年。

病中風雨寄歐楨伯

薊門衰病颯驚秋，風雨蕭蕭獨倚樓。
四海新知名下老，頻年多病客中愁。
雲連北極迷宮樹，水發西湖出御溝。
京國逢君歡不淺，可憐經月罷同游。

欵乃曲 二首

五虎山如五虎蹲
盡對無諸舊國門
無諸去後山空在
秋草蕭蕭日又昏

微茫星月下江鄉
三十六灣江水長
夜半舟人相借問
好風日出到洪塘

鄭琰 二首

琰字翰卿閩縣人

徐興公云翰卿工七言少
游邊疆集中多悲壯語

詩話翰卿詩名籍甚興致超七
言近體全得力於唐詩鼓吹者

贈顧小侯

甲第連雲瞰帝城，畫簾繡箔照朱甍。
新開馳道千金埒，舊領團營七較兵。
方士房中龍虎鼎，侍兒花底鳳皇笙。
燕山二月春初好，玉勒朝朝待曉鶯。

黃山道中

微霜風物色淒淒，路入黃山是五谿。
帝子不歸汾水上，行人愁過穆陵西。
荒原曉露銅駝泣，古驛秋風鐵馬嘶。
獨客傷神家萬里，斜陽征鴈楚天低。

胡宗仁 三首

宗仁字彭舉上元人有知載齋橐

姚園客云胡彭舉如空山

泉落薄晚霞明 顧太初
云彭舉詩奇峭多新致

詩話彭舉詩頗清真惜橐為楚人
論定必去其菁華僅存皮骨矣

立秋後夜起見明月

深夜見明月漸低西南隅
光華射虛檐照我牀頭書
開函見細字歷歷如貫珠
老眼未能讀惆悵坐庭除
風生梧葉鳴光景殊蕭疎
昨方入秋序清涼便有餘

閒居寄友

家住青溪曲春深花竹迷君來若相問直過西梁西

桃葉渡

桃葉渡頭桃葉春家家姊妹鬪妝新不知何處初來客
未省吳姬解笑人

王嗣經二首

嗣經字曰常本姓璩上饒人

郊遊

禁樹青郊外重城綠水湄園林春閨月花鳥晝晴時遠
岫平浮檻清泉曲到池晚紅翻蛺蝶新綠坐黃鸝烟斷
游絲見風輕落絮知一陂芳草色禁得馬歸遲

金陵元夕

十二城門徹曉開金壺銀箭不相催行隨燈市家家月
看到花林樹樹梅

王伯稠一首

伯稠字世周崑山人

長干曲

月出江頭白鷺飛
江花采罷濕羅衣
儂家住近長千里
自唱蓮歌伴月歸

鄧欽文一首

欽文字徵父江陰人有倚竹紀游二集

丘念先云山人

摹仿唐賢色澤
音調靡一弗具

洪光寺懷陳更菴

寺裏還藏寺山頭別起山
磴盤千級上僧占一峰間
秀

色杯前墮孤雲杖底還元龍負竒好惆悵不同攀

程格一首

格字良學休寧人翰林待詔有石林藁

蕪城晚望同方太學元卿賦

木落川原一望開孤城客思轉愁哉帆隨斷靄天邊沒
鳥帶殘陽樹杪來黃葉疎鐘秋寺暝丹楓兩岸暮潮迴
憑高欲擬參軍賦愁絕西風半草萊

汪乾利一首

乾利字和叔歙人

泗上

芒碭山前秋草多
彭城王業竟如何
雲來還作真人氣
風起猶傳帝子歌
朔鴈南飛離紫塞
淮流東下接黃河
知君躍馬能乘興
一路江山取次過

吳大經一首

大經字元常常熟人有叢桂軒集

江水

霞明江水淨潮落江帆急白鳥趁斜陽銜魚沙渚立

姚 悅 一首

悅字汝閭秀水人

秋興用杜工部韻

洞庭林屋逕逶迤震澤涼生萬頃陂菰蔣浮沉隄畔米
芙蓉開落澗濱枝琳瓊書付靈威守鰕菜船從范蠡移
七十二峰吾歷遍湖天疇識客星垂

錢應晉 三首

應晉字次卿海鹽人萬歷丙子舉人蓬州知州
有閑風館集

九日故城舟中

無處尋籬菊何人送酒來故園知滿徑此地少深杯岸
柳霜前脆雲鴻日暮哀悲秋憐楚客懷抱向誰開

酬金文學

一諾千金重貧交不世情把君書在手感我淚沾纓推
獎期先達泥塗艱此生秋宵相望處但有月同明

過河間憶許長孺侍御

攜手登臺畔存亡憶昔時酒家仍舊所柳色換新枝對
月杯難覆攀條淚欲滋風流何處覓逝者竟如斯

徐冽五首

列字仲容吳縣人萬歷癸卯舉人有嘯碧堂詩
集

踏車曲 三首

阿伴五更來喚儂踏車去赤日已三商踏車未教住

人言田家樂不知踏車苦憐歡氣力微代歡當卓午
東邊鳳仙花西邊烏桕樹不教儂上車那共歡一處

夜坐對酒 二首

松醪初熟甕生香數盞醺然對夜涼好拂桃笙魂夢穩
月斜桐樹影初長

已許侯封在醉鄉百年須醉萬千場不嫌醉裏踈狂發
自是先生醒更狂

戴 灝 一首

灝字升之嘉興人萬厯丙午舉人

宿僧院

共宿高僧院深杯賦茗柯鐘聲沉遠樹鴈影度秋河近
海金風早安禪白法多上方今夜月猶向斷橋過

明詩綜卷六十八

謹案卷六十七第十一頁前八行洛索舊作婁室
又烏珠舊作兀术今並改

卷六十八第九頁後四行額森舊作也先今改



總校官庶吉士 臣 張能照

校對官庶吉士 臣 嚴 福

謄錄監生 臣 朱 溥

欽定四庫全書薈要

集部

明詩綜卷六十九
七十

詳校官編修臣汪鏞



欽定四庫全書薈要卷二萬五百四十二

集部

明詩綜卷六十九

翰林院檢討朱彝尊編

林世璧二首

世璧字天瑞閩縣人有彤雲集

靜志居詩話天瑞為龔祭酒用卿女壻嘗從婦翁游鼓山分韻賦詩時天瑞已醉詩成題壁有眼中滄海小衣上白雲多之句坐客皆歎以為不及徐惟和詩云閒尋老衲叩禪堂墨跡淋漓滿上方一自題詩人去後白雲滄海兩茫茫蓋為天瑞作也覽彤雲集終卷才雖敏而調實庸

月

玉露晴初墜天河迴欲流誰憐今夜月還似去年秋影
逐寒雲起光緣暮杵留關山千萬里偏照漢家樓

早冬寄懷

嬾慢陶元亮經年獨掩扉不知秋色改但見菊花稀落
葉階前度寒禽樹上歸停雲那可賦徒爾壯心飛

汪禮約二首

禮約字長文更字士垓鄞人太學生

采藥行贈族子銘孺

朝出斲苓暮采薇
白日忽落蒼煙飛
荷鋤歸來倚深竹
落花清露香人衣
我家阿咸頗解事
提籠遠自江城至
肘後三千禁架方
囊中數卷軒轅記
眼前孺子總紛紛
少年提領爭如君
何當共爾尋仙去
采藥天台卧白雲

寄懷

朝雲不散暮雲流
溪上茆堂水竹幽
忽見斜陽滿高樹
亂蟬風葉似深秋

東漢一首

漢字希節華州人

無題

嫁來依舅姑不省堂前路自君去
桐廬夢熟橫江渡

姚和鼎一首

和鼎字長公長洲人

懷胡孝廉謁選

偃蹇慚予拙飛騰羨爾行
春風燕市酒夜雨闔閭城
吏

隱懷方朔貧居笑馬卿相思有尺素愁殺鴈歸聲

許賓一首

賓字觀父休寧人

入新安界

十日疲行役雲山接大鄣馬蹄知故道人語別殊方過
雨防沙溜臨溪問石梁羅含家已近蘭草徧池塘

費元祿一首

元祿字無學鉛山人有甲秀園集

勞勞亭

八月金陵秋氣涼
勞勞亭畔立斜陽
誰家別淚沾紅袖
幾處秋風起白楊
沽酒城邊頻繫馬
聞歌道上總思鄉
古今不盡東流水
多少行人為斷腸

梁有謙一首

有謙南海布衣

寄贈翟將軍

短髮蕭蕭鵠是冠
獨將詞賦老江干
停杯却憶西征路

一片青山戰後寒

逯希韓一首

希韓章丘人

山居

白髮山中老飄然遠世嚙泉流分燕尾詩橐束牛腰笑
傲花三徑酸甜酒一瓢披襟坐明月席地話漁樵

胡一桂一首

一桂字百藥鄞人

吳興九里石塘卽事

路出桑陰盡澄湖野望賒菱歌依岸柳舟影入蘆花烟
起迷村白雲移見日斜異鄉風景在羈客倍思家

汪廷訥一首

廷訥字無如休寧人有環翠堂集

詩話無如耽情詩賦兼愛填詞結環翠亭酒讌
琴歌與湯義仍王伯穀諸人游興酣聯句嘗集
唐人詩云狎鳥無機任往來一川晴色鏡中開
竹間駐馬題詩去松下殘碁送客回綠樹碧檐
相掩映落花飛蝶共徘徊物情多與閒相稱
莫惜芳時醉酒杯製百家衣可云無縫者已

夏日池上

水靜追涼便林繁得暑遲采蓮木蘭櫂佐酒竹枝詞藻
綠魚游處蘋香鳥下時不須遠歸去新月已如眉

邵正魁 三首

正魁字長孺休寧人國子監生有梁園燕臺二
集

白雲湖泛舟

堤畔連青草湖中多白雲扁舟一以泛之子得同羣卷

幔雨初歇看山日欲曛芙蓉未堪把心已愛清芬

過仲開江上居

以我不如意憐君江上村有田能種黍好客足開尊山
色青當戶潮痕白到門涼生五柳樹晤語謝塵喧

觀太學石鼓

十鼓千秋石橋門列儼然功應昭羽獵世得紀成宣想
像于岐日寧論入洛年法書存斷畫大雅在殘編色起
雲霞絢光爭日月懸依櫺星自聚照水壁猶聯呵護諸

生重臨摹博士專長同夔樂典豈羨漢經傳後作知難
及他山可罷鑄子雲徒曉事白首獻甘泉

朱應龍一首

應龍字舜夔一字近臣鄞人有東籬樂府

詩話東籬與沈明臣葉太叔盧潛齊名號明州
四傑乘月飲海上大醉溺死其短歌行云皎皎
月明駕言宵征唯君之故不
遑自寧說者以為近于識也

懊儂歌

白舫張青帆載儂歡子去風生柳樹間飄揚落何處

盛以約一首

以約字孟將一字彥修國子監生

喜雨

好雨終朝徧蓬門
野興繁憫農勞苦
日植杖桔槔園急
擢衝萍葉深池浸
竹根怪來雙屐健
散步上南原

張三極一首

三極臨清人

雨後過王明府公署

豈謂金門客能兼大隱名庭空歌鳥下吏散酒人迎綠
水新添砌青山半入城還將江上楫聊為采真行

汪元英 四首

元英字大吕休寧人有栩栩軒橐

感述

鷦鷯巢一枝鼯鼠飲滿腹林深河且廣曷不逞所欲柱
下有遺言所貴知止足疏氏二大夫解組辭榮祿今此
富貴人其欲何逐逐焉知歌器水一滿定傾覆

商山秋日對雨懷永叔仲升

秋雨何曾歇秋深倍寂寥折荷偏淅淅落木更蕭蕭雲
黑多迷徑溪寒半斷橋商山苦幽阻綺角竟難招

有客

有客沉冥久何心自解嘲病遭毛穎役貧絕孔方交歲
月甘含蓼丘園任繫匏不如將子燕華屋託新巢

秋日歸自溪上

清溪一曲石橋橫十里籃輿溪上行水碧沙明看不足

西風兩岸盡秋聲

汪元范

九首

元范字明生休寧人有借研齋草

得吳胙虞書

宿昔與君別乃在江之陽玄陰蔽光景草木日萎黃
牀下蟋蟀鳴野水鴻鴈翔居肆休百工我獨違故鄉
跋涉千里塗空念川無梁有鳥東南飛毛羽何輝光
口銜尺素書戢翼向我旁感君懷好音令我心難忘
開械再三

歎意快神自揚離居無幾時所惜道悠長此身非雙鳬
安能日頡頏

張恭父畫柳行

近代何人能畫柳東吳張生稱國手沈周陸治不復作
藝苑聲名生獨有是時燕京風日妍生也拈筆當窓前
墨花片片落縑素千樹萬樹含春烟柔條率地颺輕縷
密葉隱天帶疎雨耳畔疑聞黃鳥聲宛然坐我江潭許
對君此畫融心神頓令價比連城珍不須更寫河橋色

落日蒼茫愁殺人

泊丹陽

晚次丹陽道舟停赤岸林雲容垂嶺薄秋氣入江深落
葉隨寒雨棲鳥噪暮陰風帆無定泊行子若為心

自慎陽抵申州塗中作

冉冉悲徂景棲棲怯問津雲蒸秋變熱野晦晝飛塵壤
俗遙同楚川塗漸入申迷方知計拙幽意竟誰陳

感事呈劉思徵

宮殿菑尋弭珍奇斂益頻采珠疲百粵織罽困三秦貢
入天威霽繇興國命貧聖心元澹泊蠱媚自宵人

同楊邠州仲啓登太王城

墉堞基猶在臺隍客自過斷雲低阻嶺峻峽束涇河冰
納凌陰少民居土穴多遺風勤稼穡千載感豳歌

宿南峰

向晚躋雲嶽峰巔特室荒袖堪揮北斗夢得謁西皇石
馬嘶中夜山燈見上方鈞天聽未畢海日出扶桑

寄邢子愿三十韻

自作西京客深嗟阻舊游涼風生遠道景色入清秋董
澤蒲先脆樊川菊正稠潦收鷓鴣警露霜落鴈環洲積氣
垆邊合寒烟木末流夷猶頻出郭蕭瑟一登樓轉切懷
人思寧銷去國憂眼穿臨渭汭神越繞齊州憶過坊城
畔尋君涕水頭授餐存繾綣下榻媿淹留蓬徑要真隱
瓜畦學故侯避喧歌阜帽抗世擁羊裘側目羣公忌修
容衆女讎扶搖矜鸚雀馳騁棄驂騑貝錦徒虛織華簪

信久抽雄心翰寸翰矯志傲崇丘苑囿晴偏媚文章老
更優歎成荆國寶興狎嵒湖鷗漫擬歸同趣翻憐抱別
愁栖栖應去魯碌碌似依劉旅服凋賡緼行裝斷蒯緱
關門繻用棄幸舍轄隨投促席傾宵雨聯牀聽曉籌素
交欣再接新好競相求阮氏才皆俊岑家燕屢修未辭
漢陂負直愛竹林幽卒歲慚多累餘生實寡謀襟期良
有待會面渺無由契託他山石情懸剡曲舟尺書題字
滅欲致定沉浮

詢李惟寅太保

已就通侯第新辭上將壇不知門下士若箇是任安

程可中 三首

可中字仲權休寧人有汶上集

董次元云仲權詩肖題已爾不

挨別門蹊徑寫情已爾不共古人生活
陳伯璣云仲權詩駁駁出百穀景升之上

送章元禮吏部左遷羅定

謫籍名猶借君恩轉覺饒朱陵南紀盡丹闕北辰遙安
置憑荒裔明良願聖朝枕榔林樹外僕馬影蕭蕭

上谷

鈴閣西頭馬埒平紫駟牽過赤繁纓翻身誰中金錢的
嘶入垂楊一片聲

除夕太原府

鴈門南渡路千盤殘厯猶從馬上看白髮醉搔燈影下
錦箏搗殺不成歡

葉太叔 三首

太叔字鄭朗晚更名亭立改字介子鄞人有思

烟集藏山豪

沈嘉則云鄭朗詩醞釀初盛唐諸家而歸宿杜陵李杲堂云鄭朗

氣格高澹
轉造自然

詩話葉君嘉則

弟子別裁詩派

行路難

行路莫登高山中多猛虎行路莫乘舟水邊多伏弩我
是行路人惟知行路苦

小築

性本耽篇籍尤憐誦絕交先生號東郭小築近西郊花

霧侵衣袂茶烟亞竹梢坐行都自適好鳥語咬咬

曉晴

一月未曾乾一日雨聲昨夜喜初回高霞結海晨光滿
錦樹依山秋色開鳩厭舊巢將婦去鷗憐新水引雛來
清羸衰疾何時起獨抱漁竿坐石苔

吳紹奇

四首

紹奇字淑甫桐城人有撫松集

螢

忽向籬邊繞還從井畔飛
雨昏光不滅露重影猶微
伴讀來書舍窺眠入翠幃
黃花秋老後未識汝何歸

浦口

水市千門列江村萬井通
馬嘶流水外人語夕陽中
雪浪高吹樹蒲帆軟趁風
故鄉天際遠雙目送飛鴻

編籬

負郭幽居僻編籬接短牆
種瓜看蔓引栽菊待花黃
犬吠驚殘月雞栖趁夕陽
貧家隨分事世外得清狂

同友人飲秦淮酒樓

秦淮水漲鱗魚肥
滿店楊花作絮飛
日暮酒闌無箇事
渡頭閒數畫船歸

嵇元夫 二首

元夫字長卿歸安人有白鶴園集

詩話長卿父編修世臣嘉靖辛丑分校禮闈高
文襄出其門長卿少年簡傲獲罪嘉興某推官
坐死文襄營救獲免招入都執其手語朝士曰
此天下才也及文襄去位乘牛車出國門次日
始有馳傳後命長卿之詩蓋紀其實也一時傳
誦謂陽關三疊河滿一聲無此淒楚比還里困

甚歲暮大雪李給事樂語家人曰此時嵇公子
必大困因載酒熾炭擢舟從之見嵇方坐涯次
酌水相與劇飲而別
茗中傳為佳話云

立秋日盧溝送新鄭少師相公

單車去國路悠悠綠樹鳴蟬又早秋
燕市傷心供帳薄
鳳城回首暮雲浮
徒聞後騎宣乘傳
不見羣公疏請留
三載布衣門下客
送君垂淚過盧溝

刈稻夜歸

西莊刈稻夜半歸
明月皎皎當柴扉
榜聲隔岸人語近

斗柄插江霜氣微
木葉蕭蕭覆林屋
蘆花茫茫藏釣磯
兒童村南酒家去
野夫獨立風吹衣

吳璜一首

璜字汝震鄞人

曉發金壇出黃堰
有懷箕仲田叔

山縣侵晨發舟行
何處村宛然新水
竹疑是舊柴門急
雨來江口飛泉出
樹根無由尋二仲
幽思共誰論

黃好信一首

好信字仲孚揚州興化人有默齋詩集

春鴈

萬里湖南鴈春來又北飛亦知鄉土異不戀稻粱肥絕
塞心先到長河影漸稀玉關門外客應待問征衣

公

鼎二首

鼎字

缺

蒙陰人侍郎鼎弟有小東園詩集

都城元宵曲

二首

躑躅驂騑氣正驕垂鞭嘶過玉河橋不知明月誰家怨

腸斷樓中弄玉簫

內園湯火漫相勻
種得紅梅放早春
莫向樽前吹玉笛
朝來愁殺賞花人

李桂一首

桂字

缺

番禺布衣

江上

鯉魚風起荻花秋
露壓蒹葭水不流
何處津亭夜吹笛
白雲明月總關愁

盛鳴世 六首

鳴世字太古鳳陽人國子監生有谷中集

詩話太古五言圓潤貼妥其源出于郎士元

沈水部官署

江水流何急歸心却似之已傷為客久轉恨別君時斷
鴈迷寒渚吟猿挂冷枝生涯兼物色何處不堪悲

贈隱者

只在高霞外無人識去蹤伴猿栖一室放鶴下孤峰丹

竈雲中火青天夜半鐘平生長往意相望不相從

送柯孝廉之巴東兼呈黃廣文

去問巴江水荆門更向西挂帆秋葉落上峽夜猿啼舊
侶傷飄泊新歡惜解攜湘潭憔悴地已恐旅魂迷

七月八日潞河舟中別長安諸子

天漢龍初返星橋鵲乍分隔河收片雨宿浦有殘雲復
作孤舟別兼悲一葉聞相看此時恨不獨在離羣

宿麻河

積雨湖田沒居人生事微白魚休市早烏鬼載船歸月
黑村春盡林深岸火稀緯蕭眠不定中夜賦無衣

題岳陽酒家

巴陵壓酒洞庭春楚女當壚勸客頻莫上高樓望湖水
烟波二月已愁人

布帆日暮掛春風三楚波濤在眼中倚檻不知人散盡
醉來高唱大江東

園居

晝勞夕得適幽窓成小憩峰色落空青池光起浮翠須
臾暝色深繁星看欲墜新月下疎篁微風動檐際樂此
坐忘言悠悠更忘寐

沔池有懷

會盟壇下沔池流草色連天蔽故丘隴月只看懸太白
秦雲不解到幽州

汪應宿一首

應宿字南仲歙縣人

送王祠部僉憲貴陽

地入三苗盡山過蜀道難飛泉晴亦雨毒霧晝猶寒方
竹迷秦徑氈裘拜漢官西南民力竭君好慰凋殘

應 臬一首

臬字仲鵠鄞縣人學生有楚游烏溪詩草

烏溪

寄我江湖流浪身烏溪山水故清真春田雨足騎秧馬
秋隴禽多縛草人睡起竹窓書一卷坐來莎石酒三巡

願如在巷顏夫子到處簞瓢不厭貧

李宗城一首

宗城字汝藩盱眙人

送臧晉叔國博還吳興

宦自潘安拙才應宋玉偏還家千嶂雨挂席五湖烟以
我多愁日逢君失意年江干一尊酒寧不倍淒然

陳鳴陽一首

鳴陽字

缺

南海人參政萬言子

閨情

露冷凌波步不前
流螢相撲自年年
妾身未似齊紈扇
不待秋來已棄捐

林國光一首

國光字廷錫閩人

金陵尋舍弟聞先三日往蕪湖悵然賦此

春江雨漲綠平堤
岸柳青青拂水齊
日暮相思不相見
鵲鵲飛過野塘西

王之鼎一首

之鼎字象玄江陰儒學生

贈友人卜居

高士移家處來尋路不迷雞鳴深巷裏門掩斷橋西招
隱仍栽桂看山獨杖藜平生厭塵事今日遂幽棲

何壁一首

壁字玉長福清人

詩話玉長任俠見知于黃陂張濤張後開府遼東將疏薦以布衣拜大將會罷鎮乃止濤卒入

楚哭之遂以病死亦矜奇之士也寄友詩云士
到出山誰不賤術惟游世最難工足當阮生之
泣矣

西湖尋曹能始

垂楊漠漠苻田田何處春風十四絃
放鶴僧歸三竺雨
聽鶯人過六橋烟
詩尋蘿薜誰邊寺
酒載桃花第幾船
游子天涯魂易斷
非關春樹有啼鵑

汪樞二首

樞字伯機鄞人有存侯篇

詩話伯機世祿之家不樂仕進治別業曰泡園賦園居詩六十首閩人徐興公極稱之

懊懷曲

千金買妾身一旦遠行邁大艚如屋寬底事不相載

早秋刈穫述懷

杲杲朝日升垂垂水田熟
嗚嗚呼白雞泱泱飲黃犢
稍稍暑收灤灤露華沃
庭戶絕追呼春秋足魚菽
卒歲計所餘脩我牆與屋
男悅女欣欣杯炙勞僮僕
躬耕一丘田飽食詎非福

戴景明一首

景明字晉仲休寧人有團雲詩集

深秋山居

莓蘚深層岫松杉漾北淙清宵唯鶴唳盡日少人逢倚
檻三秋老攤書萬事慵夜分魚鳥靜明月半東峰

沈瑞徵二首

瑞徵字靈繹海寧學生有慧居遺集

尤展成云
先生詩清

麗有則中多
激楚之音

詩話先生五言如落木悲秋氣浮雲起夕陰雁
聲春半少寒色雨中多野犬迎人吠流鶯隔樹
聞雪鷗輕片片烟樹遠冥冥竹翠侵衣濕峰陰
入戶涼高者近大厯十子下亦不失為四皇甫
也惜年未四十而沒遺詩一
卷孫翰林編修珩刊行之

杪秋同諸君游石井山

絕巘攀躋外蒼茫秋色殘雲山千里出烟樹萬家攢石
轉奔濤壯天空落日寒扶桑一矯首海氣正漫漫

錢清夜行

秋漲乘流好孤村夜泊稀漁榔過橋遠螢火傍舟微堤

沒聞爭渡涼生欲授衣夢歸懷土切山水願多違

侯維垣 一首

維垣字師之儀真人國子監生

九日送友入九華

秋空削出青蓮花時吐白雲含紫霞九月九日九華去
此中可以鍊丹砂

江禹奠 六首

禹奠字其永休寧人僑居吳縣國子監生有玄

芝館詩集

王伯穀云山林臺閣各有體裁其永作山林詩却無寒儉語 張伯起云

其永詩有

軒爽之致

詩話其永與王伯穀共肄業于留都而詩名未振然其五言清切如秋雨半沉閣夕陽已在山落葉半庭月啼烏滿屋霜寺出寒烟外山沉細雨中雨洗松根石雲開屋後山山影隨帆轉溪聲挾雨飛久有青山志因歌白露詩頗類鵝池生

夜坐七松齋中懷睦州嚴徵君

茅齋結翠屏獨坐酒初醒殘月半窓白孤燈四壁青篋中換鵝帖几上種魚經遙望投竿處寒雲隱客星

嚴陵城下

背郭千村合中流一刹孤輕陰閣秋雨殘照落平蕪入
市魚鰕少歸舟鴈鷺呼客囊任羞澁解珮問當壚

被放偶占

放歸吾嬾甚二月寄僧居無日不飲酒有時還著書泉
飛茶臼冷雲動竹窓虛徑僻少塵跡青苔久未除

東倉

信宿翠微上脩然絕世氛喬林含曉日清磬落層雲海

色當窻見泉聲入夜聞半生塵土夢俱向此中分

九日登山

東籬菊蕊半含黃酒伴何須定故鄉寄語柴桑陶處士
百年風物幾重陽

邨居即事寄天都李使君

日照雲林宿雨休一灣溪水入江流野人家住清溪上
坐對寒山兩岸秋

周良寅 一首

良寅字

缺

閩人

夜泊始興江口

繫纜荒山下挑燈細雨前
客心共流水搖蕩不成眠

蔣世模一首

世模字叔範江陰人

江行

晴沙漾漾見飛鳬
隔浦帆檣乍有無
身在江南望江北
接天秋水浸菰蒲

段 黼 一首

黼字黃甫曹州人有抱璞集

西郊

十里平原地青山遶碧林寒開烟雨色天遠雁鴻心落
葉還蕭索浮雲自古今不妨乘暇日載酒數登臨

劉 權 一首

權字叔度休寧人有劉叔度詩集

讀宋史

六龍奔走竟何依
粵海舟航事已非
回首中原無正朔
傷心絕島作王畿
身沉魚腹靈均死
血染鵑聲望帝歸
愁向厓山瞻王氣
寒濤終古蕩斜暉

姚旅一首

旅初名鼎梅字園客莆田人

詩話園客放浪湖海綴拾舊聞露書一編頗存
軼事其評騭一時詩家遠比敖器之近續王元
美

山家

水盡重重客路山開處處人家粉壁斜街落照珠簾半
卷桃花

魏之璜一首

之璜字考叔上元人

訊程孺文

不得巢湖信時詢渡口居繞籬河路曲背郭草堂虛林
靜風驚犬溪喧晚聚漁主人游未倦閒殺半牀書

汪功胄 二首

功曹字介夫休寧人有介夫存橐

詩話介夫大呂之子善詩而
天存橐二卷大半學李長吉

春日閒居

韶景當春半閒居覽物華
綠分當戶竹紅過隔牆花
樵牧依林近溪山帶郭斜
閒身甘自放吟卧寄烟霞

樵舍

烟火隱茅茨數家傍山麓
林深不見人丁丁聞伐木

金鑑一首

鎰字用衡鄞人有桂莊豪

贈同谷山人

太白之陽有同谷同谷之中白雲宿美人結廬谷口居
朝朝暮暮雲相逐我來問君君不言雲裏長鑱種黃獨

王授一首

授字子予江陰人

送常熟李瑞卿

柳暗花明春雨天鶉鳩聲裏一歸船相逢已是十年別

為問人生幾十年

黃習遠 一首

習遠字伯傳吳縣人有蕭蕭齋橐

寄朱宸卿

與君同里閨只隔數家居無日不相見有時還寄書開
尊呼共飲得句問何如自作長干客別來三月餘

高文祺 一首

文祺字壽承廣信人

自君之出矣

自君之出矣不種相思樹思君如春草多在無人處

吳邦達一首

邦達字非聞休寧縣學生

江樓送別

把袂層樓上虛窓四望平柳烟邨外市花雨驛邊城東
去潮千里南歸客幾程當歸愁欲別津樹重含情

潘鏞一首

鏤字聲遠江陰人

寄懷

孤燈一點照書龕
離思沉沉睡正酣
無那角聲吹落月
夢魂飛不到江南

張 儲一首

儲字明用新建諸生

聞鴈

孤鴈來何處
殘聲靜夜飄
江空音泔泔
雲重影蕭蕭
慣

向風前急偏從聽處遙秦川織錦婦掩淚憶征遼

周應辰一首

應辰字斗文鄞縣學生有綠莊詩采

詩話綠莊遊鄒南臯之門南臯問曰使周生為仲尼弟子將誰學對曰某小人願學樊須閭者以為善于說解閩人林古度序其詩稱其色古而骨堅

古詩

行行重行行夕陽在崦嵫暮鳥有倦翼寒木無榮枝少壯不逢年垂老誰見知

朱純元一首

純元字二芭溧陽人

東溪港

十二街頭跡已賒
草堂低占白鷗沙
武陵此去無多路
灤水西來第幾家
野岸綠蕪飛燕子
汀洲紅雨落桃花
滄浪不洗塵埃耳
只許漁郎泊釣槎

吳宗儒二首

宗儒字次魯休寧人有巢雲集

游黃山

九月秋氣高抗策恣游眺天都陟崔嵬洞門入窈窕緩
行憇松根徙倚臨霞嶠探奇壑轉深攬勝景逾妙山蹊
縈以紆石壁陡而峭瀑布挂晴川懸厓迴夕照地與仙
境俱凌厲討佳要孫阮予非倫于焉學長嘯

春夜錢塘江行

小艇發江干入夜東風起帶雨挂輕帆西行三百里

劉時中一首

時中字伯庸休寧縣學生

有客

有客問烟蘿山家在何處笑指碧溪頭遙遙踏花去

虞伯龍一首

伯龍字公普鄞人有擔簦集

舟中

寥落明州客孤懷寄短篷江豚偏狎浪舟子但呼風歸
夢隨流水鄉書問去鴻不知今夜月千里可相同

沈木一首

木字子喬嘉興人萬厯間縣學生有近竹豪

詩話子喬自號靜得逸
人夜起一詩具臻佳境

夜起

暑夜不成寐起步中庭中殘月忽墮水明河猶在空籬
根滴清露樹杪生微風坐愛新涼好先秋有候蟲

傅邦柱一首

邦柱字石卿金華人

雜詠

鸚鵡多巧慧交交調好音翻飛嘉樹杪毛羽殊衆禽一
旦遭量罰萬里辭故岑彩絲紺紺趾雕籠照翠衿徘徊
當簾幕聰慧增苦心鶯斯微以陋提提蓬蒿陰

鄧秉貞 一首

秉貞字予坦宜興人有禹笑齋詩安隱集

嚴子陵釣壇

經過百世見清風爭羨羊裘一老翁不有雲臺諸將力

釣壇亦在戰爭中

徐電發云自有雲臺爭比釣臺高之句作此題者陳陳相因得予坦一詩

稍開
生面

孫元字一首

元字字

缺

休寧人有滄洲草

草市夜泊

違家才一舍露宿尚河洲
暝霧連汀白寒雲壓水流
灘聲鳴野碓燈影隔鄰舟
入夜霜風急淒清動客愁

吳鶴一首

鶴字

缺

烏程人

望潤卿弟

仲月辭家日臨歧接汝書相傳及春暮應得返衡廬衣
逐客程換花隨驛路疎來帆遙數盡不見愴何如

王

壑

一首

壑字巽父金壇人有旅言

南安道中

疊疊青山曲曲溪湍流活活雨淒淒孤舟日暮南來客

恨殺鷓鴣相向啼

戎 玠 二首

玠字孟常鄞縣學生有蜀游草

晚霽與客登浩然樓眺錢塘江

晴色開邨樹危樓俯大江潮聲翻絕岸帆影落虛窓水
與遙天合人同夕鳥雙茫茫百端集形影若為降

泊巴東

昔行指川北今始詣巴東山縣無重郭江天有斷虹亂

峰雲欲暝官渡火初紅剪燭供清話蕭蕭暮雨中

趙雲蒸 一首

雲蒸字龍伯太倉人國子監生有世藝齋橐

北上

飛沙如雪晝茫茫始覺長安道路長遙憶小樓臨水曲
八窓風日正虛涼

顧孟林 一首

孟林字山甫吳縣人

寄陸纂父

日日看山色知君在此中祇因一水隔難以尺書通
白乳思林屋青霞記石公儻然乘興去相見對秋風

丁雲鵬一首

雲鵬字南羽休寧人有丁南羽集

詩話南羽工畫其寫神王羅漢骨氣
奇偉不減大小尉遲詩特具體而已

舟次尤溪

客程迷水國山靄護城闌歲涉三冬暮花先十月春魚

鹽通海販橘柚落園珍故舊頻勞慰荒塗未厭貧

方于魯二首

于魯初名大澈後以字行改字建元歛布衣有

佳日樓詩集

梅李豹云建元詩有唐風 屠緯真云建元尊函叟而詩不盡稟函叟

詩話古人製墨率用松烟漢取諸扶風晉取諸廬山唐則易州上黨自李超徒歛張谷徒夥皆世其業其後耿仁遂高慶和戴彥衡吳滋胡智率多歛人明則羅文龍少華邵克已格之程大約君房輩咸以製墨稱而于魯所製最夥上自符璽圭璧下至雜珮凡三百八十五式刊成圖譜曾上呈乙覽所造雲箋匪止成都十樣嘗以百花香露和墨自作長歌世但目為墨工然汪

伯玉曾招之
入豐干社

送張山人歸越

雉子斑斑麥正齊
黃梅四月雨淒淒
新安江上攜尊酒
送爾看山到浙西

璞石席上作

十年不慣出家門
千里來逢故舊存
正值江干春未晚
萋蒿荻笋煮河豚

向杰二首

杰號培竹慈谿人

題畫

雨過迴塘水亂流
汕魚人去櫂孤舟
荻花楓葉寒江外
獨鶴一聲霜滿樓

寄羽士

幾欲尋真未得閒
白雲堆裏望玄關
煩君多養雪色鹿
借我來時騎看山

明詩綜卷六十九